

## Канон святого мученика Вонифатия, глас 4.

### Песнь 1

**Ирмос:** *Тристаты крепкия, Рождейся от Девы, безстрастия во глубине души тричастное потопи, молюся, да Тебе, яко в тимпане, во умерщвление телесе победное воспою пение.*

**У**сердным помыслом подвигом ревновав доблих страдальцев, пострадал еси крепко и змия умертвил еси страдания твоими живоносными, страдальче Вонифатие, святых Ангелов собеседниче.

**В**идев на земли вражию лесть, излианну люте, доблий страдальче, душу распалив желанием Божественнейшим, вшел еси в тризнице небоязненным, треблаженне, мудрованием.

**М**удростию Божественною просвещаемый, блаженне, немудрыя враги объюродил еси, Христа возвещая, дебельством плоти уподобльшася, имже явится восхоте, Вонифатие, мучениче многострадальне.

**Богородичен:** **Г**ору Божию, юже провиде Даниил, скинию мысленную, Марию Чистую, славы священие, трапезу, Божественный хлеб вмещшую, вси вернии, единомудренно воспоим.

### Песнь 3

**Ирмос:** *Яко неплоды роди от язык Церковь, и многое в чадех изнеможе сонмище, чудному Богу нашему возопиим: Свят еси, Господи.*

**Я**коже возжелел еси, славне, свободу Вышнюю, от ига работы избавляешися, страстем честным поревновав, славне, иже за милосердие раба бывшего.

**П**лотских вышший явлься мудрований изменением Божественным, внезапно всяк прилог лютых претерпел еси, радуясь, мучениче Вонифатие.

**Т**ебе самага отверглся еси, и к подвигом и борением врага изшел еси, Креста оружием укрепився, и, победитель быв, прославился еси, мучениче Вонифатие.

**Богородичен:** **С**ебе Самага истоци, Отческих не истоцив во чреве Твоем недр, пресущный Бог и Твой Сын бысть, Всенепорочная, спасая человечество.

### Кондак, глас 4

**И**зыде к приятию страсготерпческих мощей и страждущих законне веры ради зря, показал еси мужески крепость свою, устремився на страсти исповеданием во Христа, Иже прием почеть победы твоего страдания, Вонифатие, присно моли за ны.

### Седален, глас 4

**К** сословию послан мучеников, мученик был еси истинен, пострадав за Христа крепчайше, всехвальне, бремя же, блаженне, отдался еси верою пославшей тя, Вонифатие блаженне. Но прилежно моли прияти всем согрешений совершенное прощение.

#### Песнь 4

**Ирмос:** *Любве ради, Щедре, Твоего образа на Кресте Твоем стал еси, и растаяшася языцы: Ты бо еси, Человеколюбче, крепость моя и хваление.*

**У**блажая страждущих терпение, подобием, мучениче, честных страданий сим уподобился еси, Богомудре пребогате.

**И**дый верою к мучеников Божественному сословию, блаженне, тебе самага желающей бремя досточудное, Богомудре, отдал еси.

**О**чищен, якоже злато, мучениче, язв горнилом, чистейший явился еси, нося Зиждителя страстей изображение.

**Богородичен:** **Д**евство по Рождестве запечатанно познаваючи, Отроковице, несказанно рожденного Слова из боку Твоею верно величала еси.

#### Песнь 5

**Ирмос:** *Просвещение Твое, Господи, низпосли нам и от мглы прегрешений разреши ны, Блаже, Твой мир даруяй.*

**Я**ко светозарная возшел еси звезда от запад, и зашел еси, мучениче, страданьми терпеливно, абие к западом возсиял еси, озаряя концы.

**М**ученически подвизался еси, ногтей терзания, острыми, мучениче, тростями сбодаемь, и лукаваго жала верно притупляя благодатию.

**В**ражия изнемогоша, Богомудре, на тя коварствия, ибо к Богу воззрением неуклонным плотския раны, якоже безплотен, терпел еси.

**Богородичен:** **С**кверны всякия омой, Дево, душу мою, вопию Ти, и спаси мя, Чистая, Яже истиннаго Бога Спаса на земли воплощшая.

#### Песнь 6

**Ирмос:** *Возопи, прообразуя погребение тридневное, пророк Иона, в ките моляся: от тли избави мя, Иисусе, Царю сил.*

**Б**иемый, ранами плотскими уязвил еси безбожн्या, неисцельно недугующия неведением, и болящим явился еси врач, страдальче Вонифатие.

**В**озвышаемь к Богу, блаженне, прилогом подвигов, враги невидимыя разразил еси и низриновенным помощник, страстотерпче, был еси.

**В**лачимь по земли, якоже камень многоценен, страдальче, прелести низложил еси утверждение, верных же сердца наипаче верою утвердил еси.

**Богородичен:** **К**упина Тя проображаше, Всенепорочная, первее, горящи и никакоже опаляема, Пречистая, ибо, якоже она, не опалилася еси, Бога воплощши.

#### Кондак, глас 4

**С**вящение непорочное самовольне Тебе привел еси, Иже от Девы тебе ради родитися хотящему, святе венченосче, премудре Вонифатие.

#### Песнь 7

**Ирмос:** *Авраамстии иногда в Вавилоне отроцы пещный пламень попраша, песнями взывающе: отцев наших Боже, благословен еси.*

**К**олен не преклонив истуканным, во искушение верглся еси величайшее, истинно, мучениче, в пещь, в нейже орошаемый, благодарствовал еси Христу во веки.

**Р**азорити крепость твоего исповедания тщася, льстивомудренный во внутренняя твоя клокочущее олово немилостивно вливает, но яве посрамися.

**П**осечен быв усердно в честную твою главу, врага льстиваго многокозненную главу отсекл еси твоего мужества мечем, мучениче Христов Богомудре.

**Богородичен:** **Д**а гласы подобающими песнословлю Тя, Отроковице, страстей мя избави молитвами Твоими, бед же и скорбей и лукавых человек, озлобити мя ищущих.

#### Песнь 8

**Ирмос:** *Избавителю всех, Всесильне, посреде пламене благочествовавший, снишед, оросил еси и научил еси пети: вся дела, благословите, пойте Господа.*

**П**олезно твое делая спасение Христос, Вонифатие, взыскающа мощей добропобедных мучеников, тя укрепляет, еже верно взыскал еси сам быти.

**Б**лаженней госпожи блаженно сокровище подался еси, блаженне, имже обогатившись, пояше веселым сердцем: вся дела, благословите, пойте Господа.

**С**о тцанием славная жена, воздвигши храм священнейший, тя в нем положи, сущий Божественный Троицы храм, страстотерпче Христов Вонифатие.

**У**мертвився за любовь Зиждителя, умерщвляющего страсти тлетворныя, животворяй молитвою твоею ясно вопиющия: вся дела, благословите, пойте Господа.

**Богородичен:** **Н**а Тя, Чистую, Пребожественный, низшед, якоже весть, воплотися и человеки обожи, песнопоющия, Дево: вся дела, благословите, пойте Господа.

## Песнь 9

**Ирмос:** *Ева убо недугом преслушания клятву вселила есть; Ты же, Дево Богородице, прозябением чревоношения мирови Благословение процвела еси. Тем Тя вси величаем.*

**В**идевши тя, бремя священное, радовашеся, вопиющи, приснопомнимая: раба послах тя, блаженне, господина истинна приемлю, работы мя зол избавляюща твоими благоприятными мольбами.

**Я**ко крин, во удолиих мысленных процвел еси мучеников, Вонифатие, якоже финикс, возвысился еси, яко кедр, познался еси миродыханен, явился еси избранный, яко кипарис, благовонствуя души наша.

**Д**несь память твоя нам возсия, страстотерпче, якоже солнце, сиянием Божественных дарований, просвещающи души поющих тя, страстей же мглу отгоняющи, мучениче Богомудре всеблаженне.

**Я**ко солнце от запад, возсиял еси и восточнаго града достигл еси, идеже пострадав и смертью зашед, к жизни востекл еси и Рим светлый достигл еси, сего ограждая мольбами твоими.

**Богородичен:** **С**ветом мя озари Твоим, Всенепорочная, во тьме содержимаго греховней, Богородице, и подаждь во дне ходити Божественных повелений, Богоневесто, яко да пою Тя, Всепетую.